

Nakorsaatit pilerisaarutigineqartarnerat pillugu Namminersornerullutik Oqartussat nalunaarutaat

Nakorsaatit pillugit inatsisisartut peqqussutaanni nr. 1-imi 12. maj 2005-imeersumi § 22, imm. 2, aamma § 24, imm. 4, naapertorlugit aalajangersarneqarput.

Atuuffia

§ 1. Nalunaarummi pineqarput nakorsaatit, nakorsaatit pillugit inatsisisartut peqqussutaanni pineqartut pilerisaarutigineqartarnerat.

Imm. 2. Aviisit nunanit allanit tikisitat, atuagassiat, atuagassiat sap.akunniukuutaartumik saqqummersartut aamma tusagassiorfiit assilissanik sarsuatitsiviit nalunaarummi matumanii piumasaqaatinut ilaatinneqanngillat.

Innuttaasunut pilerisaaruteqartarneq

§ 2. Innuttaasunut nakorsatinik pilerisaaruteqarneq ima ilusilersorsimassaq pilerisaarutaanera aamma pilerisaarummi nakorsaatit pineqarnerat erseqqissumik takuneqarsinnaassalluni.

Imm. 2. § 3-mi taaneqartut eqqaassanngikkaanni pilerisaarummi makku paasissutissiissutigineqassapput:

1) Nakorsaatip taaguutaa. Nakorsaat sunniuttartumik ataasiinnarmik aqoqarpat, ataatsimut taaguut atorneqassaaq.

2) Sunniutai, saniatigut sunniutai annertussusiliisarnerlu.

3) Poortat qanoq annertutigisumik imaqarnerat.

4) Poortap iluani allagartakkut imaluunniit poortap qaavani allagartakkut ilitsersuutigineqartut peqqissaartumik atuarneqarnissaat ersarissumik atuaruminartumillu kaammatuutigineqassaaq.

5) Nakorsaasiortup internetimi adresa.

6) Nakorsaatip eqqortumik pissusissamisoortumillu atorneqarnissaanut paasissutissat allat pisariallit.

7) Nalornisoqartillugu nakorsamut imaluunniit uumasut nakorsaannut attaveqarnissamik kaammattuut.

§ 3. Filmertarfinni filmit pilerisaarutit, aamma videokkut dvd-kkullu isiginnaagassiani pilerisaarutit paasissutissanik makkuningga imaqassapput:

1) Nakorsaatip taaguutaa. Nakorsaat sunniuttartumik ataasiinnarmik aqoqarpat, ataatsimut taaguut atorneqassaaq.

2) Sunniutai saniatigullu sunniutai.

3) Poortap iluani allagartakkut imaluunniit poortap qaavani allagartakkut ilitsersuutigineqartut peqqissaartumik atuarneqarnissaat ersarissumik kaammatuutigineqassaaq

4) Nakorsaatip eqqortumik pissusissamisoortumillu atorneqarnissaanut paasissutissat allat pisariallit.

5) Nalornisoqartillugu nakorsamut imaluunniit uumasut nakorsaannut attaveqarnissamik kaammattuut.

§ 4. Nakorsaatip innuttaasunut pilerisaarutiginerat:

- 1) nakorsamut imaluunniit uumasut nakorsaannut nakorsiarnissap pisariaqannginneranik isumaqalersitsissanngilaq,
- 2) nakorsaatip sunniuttarnerata qulakkeerneqarsimaneranik, kingunerlutsitsisannginneranik imaluunniit allatut katsorsarneqarnermit, tassunga ilanggullugu allamik nakorsaatitortinnejnarnermit pitsaaneruneranik imaluunniit assinganik sunniuteqartarneranik isumaqalersitsissanngilaq,
- 3) nalinginnaasumik peqqissutsip nakorsaatitornikkut pitsaanerulersinnejqarsinnaaneranik isumaqalersitsissanngilaq,
- 4) nalinginnaasumik peqqissutsip nakorsaatitunnginnikkut ajornerulersinnejqarsinnaaneranik isumaqalersitsissanngilaq,
- 5) pilerisaarinermi meeqqat kisiisa eqqarsaatigalugit meeqqalluunniit pingarnerutilugit saaffigineqassanngillat,
- 6) ilisimatusartunit, inunnit nakorsaatislerisunit inunnilluunniit allanit, inunnit peqatigiinnit, paaqqinnittarfinit, sullivinnit il.il. ataaqqisaanertik sakkugalugu nakorsatinik atuinerulersitsinnaasumik kaammattuutinik imaqassanngilaq,
- 7) nakorsaat inuussutissanut, pinnersaatinut allanulluunniit nioqqutissanut sanilliunneqassanngilaq,
- 8) nakorsaatip akuisa "pinngortitameersuunerat" peqqutigalugu nakorsaatip isumannaatsuuneranik imaluunniit nakorsaatip sunniuteqartarneranik isumaqalersitsisoqassanngilaq,
- 9) nakorsaat kukkusumik imminut nappaasersornissamut uukapaatitsisinaassuseqassanngilaq,
- 10) nakorsaat ingasattajaartumik, annilaanganartumik imaluunniit paasinerlunneqarsinnaasumik peqqississutaasinnaaneragaassanngilaq,
- 11) nappaammik imaluunniit aqqunarternermik pissuteqartumik imaluunniit nakorsaatip inuup timaanut imaluunniit timaata ilaanut sunniuteqartarnera pissutigalugu inuup timaata allangorneranik takutitsisut assilisat, titartakkat il.il. ingasattajaartut, annilaarnartut imaluunniit paasinerlunneqarsinnaasut atorneqassanngillat,
- 12) nakorsaatip Kalaallit Nunaanni avataaniluunniit pisortat oqartussaasuinit akuerineqarsimaneranik ilisimatitsissummik imaqassanngilaq,
- 13) nappaatit ilungersunartut imaluunniit nappaatit ilungersunartut ilisarnaataat toqqaannartumik toqqaannanngikkaluamilluunniit oqaatigineqassanngillat, imaluunniit
- 14) misissuinerit, atuakkiat, atuagassiat il.il. innersuussutigineqassanngillat.

Imm. 2. Imm. 1-imi nr. 4-mi, 12-imi aamma 13-imi aalajangersakkat akiuussutissalersueqqusinernut assigisaannulluunniit Peqqissutsumut Naalakkersuisumit akuerineqarsimasunut atuutinngillat.

Nakorsaatislerisunut il.il. pilerisaarineq

§ 5. Nakorsaatislerisut pineqartut tassaapput nakorsat, ernisussioruntuunerit, peqqissaasut, kigutit nakorsaat, uumasut nakorsaat, nakorsaasiortut aamma nakorsaatislerisut kiisalu suliat taakku iluanni ilinniagaqartut.

§ 6. Nakorsaat pillugu nakorsaatislerisunut pilerisaarinerit aamma paassisutissiinerit paassisutissanik § 2-mi imm. 2-mi nr. 1-6-imi taaneqartunik imaqassapput.

Imm. 2. Imm. 1-imi paassisutissat saniatigut atortussat taaneqartut aammattaaq imarissavaat paassisutissat makku:

- 1) Nakorsaasiorfiup aqqa.
- 2) Nakorsaatip sumut iluaqutaasinnaassusia, nakorsasiarineranik eqikkaalluni allaaserisami

allassimasutut.

3) Nakorsaatip sumut iluaqutaasinnaanngissusia.

4) Nakorsaatit suussusii.

Imm. 3. Paasissutissiinermut atatillugu issuaanerit, takussutissiat aamma assiliartat nakorsaatit ilisimatusarfigineri pillugit atuagassianit, ilisimatusarnernit atuakkianit il.il. tigulaarinerit ilumoorluni issuaaffigineqarsimassapput najoqqutarineqarsimasullu eqqortumik ilisimatitsissutigineqassapput.

§ 7. Nakorsaatip pilerisaarutiginissa imaluunniit aamma tunisaanerata siuarsarnissa siunertaralugu 1) nakorsaatilerisut aningaasatigut iluaqutissaannik, tassunga ilanngullugit akikilliliissutinik, pissarsiat tapiinik assigisaannillu imaluunniit ajunngitsorsiassanik aningaasaanngitsunik tunineqassanngillat, neqeroorfigineqassanngillat imaluunniit neriorsorneqassanngillat, imaluunniit

2) nakorsaatilerisut unammisinneqassanngillat akissarsiassaqtinnejassanatillu.

Imm. 2. Imm. 1-imi, nr. 1-imi inerteqqummi nakorsaatilerisup pineqartup inuussutissarsiutitut ingerlataanut attuumassuteqartut nioqqutissat naleqanngingajattut pineqartunut ilaangillat.

Imm. 3. Imm. 1-imi inerteqqummi akikilliliinermik imaluunniit pissarsiat tapiinik aaqqissuussinerit nioqquteqartartup akissaajaatitigut sipaaruteqarneranik illuatungilerneqartut, akikilliliinerit akissaajaatinik pissuteqartut, pineqartunut ilaangillat. Akikilliliissut imaluunniit pissarsiat tpiat tassaassaaq akinut ilanngaat, taamaallaallu nakorsaatinik pisisunut toqqaannartumik tutsinnejassalluni.

Imm. 4. Nakorsaatilerisut ajunngitsorsiassanik imm. 1-imik unioqqutitsisunik noqqaassuteqaqusaanngillat tunineqassanatilluunniit.

§ 8. §§ 6 aamma 7-imi aalajangersakkat nioqqutissanik tuniniaaffinnik, nakorsatinik pilerisaarinermi pineqartunik piginnittunut sulisunullu taamatuttaaq atuupput.

Nakkutilliineq

§ 9. Nalunaarut manna malillugu nakorsaatit pilerisaarutigineqartarnerat pillugu aalajangersakkat eqquutsinneqarnissaat Peqqinnissakkut Nakkutilliisoqarfiup nakkutigissavaa.

§ 10. Nalunaarut unioqqutillugu pilerisaarinerit unitsinneqarnissaat Peqqinnissakkut Nakkutilliisoqarfiup peqqussutigisinnavaa.

Imm. 2. Inatsisinik unioqqutitsilluni pilerisaarinermi akisussaasoq imm. 1-imi aalajangersagaq naapertorlugu aalajangiineq malillugu imaluunniit pilerisaarummik naqqiinermik nammineq akilikkaminik tamanut saqqummiusseqqullugu Peqqinnissakkut Nakkutilliisoqarfiup peqqusinnaavaa.

Imm. 3. Imm. 1 aamma 2 malillugit Peqqinnissakkut Nakkutilliisoqarfiup peqqusinera Peqqissutsimut Pisortaqarfimmut suliassanngortinneqarsinnaavoq. Suliassanngortitsineq peqqusinerup atortilernissaanut kinguartitsissutaasinnaanngilaq.

Pineqaatissiissuteqartarneq

§ 11. § 2, § 3, § 4, imm. 1, § 6 aamma § 7, imm. 1, unioqqutikkaanni akiliisitaasussanngortitaanermik pineqaatissiissutaasinnaapput.

Imm. 2. § 7, imm. 1, unioqqutillugu ajunngitsorsiassatut tunniunneqartut arsaarinnissutigineqarsinnaapput.

Atuutilerfia

§ 12. Nalunaarut atuutileroq ulloq 1. januar 2006.

Namminersornerullutik Oqartussat, ulloq 14. november 2005

Asii Chemnitz Narup

/

Søren Rendal

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut